

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১৭/২০১৭-১৮

ঢাকা, সোমবার ২৪ জুলাই ২০১৭, ৯ শ্রাবণ ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। শিক্ষার গুণগত মানের দিকে সর্বোচ্চ গুরুত্ব দেওয়া হচ্ছে : প্রধানমন্ত্রী
- ২। রুটিন ওয়ার্ক নয়, উদ্ভাবনী শক্তি কাজে লাগান : জনপ্রশাসন পদক প্রদান অনুষ্ঠানে প্রধানমন্ত্রী
- ৩। মুক্তিযুদ্ধের সঠিক ইতিহাস শিক্ষার্থীদের জানাতে হবে : রাষ্ট্রপতি
- ৪। ভিয়েতনামের বিনিয়োগকারীদের বাংলাদেশে বিনিয়োগের আহ্বান স্পিকারের
- ৫। স্বাস্থ্যখাতে দুর্নীতি করলে ছাড় নয় : স্বাস্থ্যমন্ত্রী
- ৬। চামড়াজাত পণ্য রপ্তানিতে বাংলাদেশ শীর্ষস্থানে যাবে : শিল্পমন্ত্রী
- ৭। নতুন পদ্ধতিতে খাতা মূল্যায়নে পাসের হার কমেছে : শিক্ষামন্ত্রী
- ৮। প্রবাসী কর্মীরা যেন সেবাবঞ্চিত না হন : প্রবাসীকল্যাণমন্ত্রী
- ৯। বিমানের হজ ফ্লাইট শুরু আজ
- ১০। বাড়ি করতে খরচের ৭৫% ঋণ পাবেন প্রবাসীরা : বাংলাদেশ ব্যাংকের প্রজ্ঞাপন

১। শিক্ষার গুণগত মানের দিকে সর্বোচ্চ গুরুত্ব দেওয়া হচ্ছে : প্রধানমন্ত্রী

প্রধানমন্ত্রী শেখ হাসিনা এবারের এইচএসসি ও সমমানের পরীক্ষার ফলাফলে সন্তোষ প্রকাশ করে বলেছেন, ভবিষ্যৎ প্রজন্ম যেন বর্তমান বিশ্বের সঙ্গে তাল মিলিয়ে নিজেদের গড়ে তোলার সুযোগ পায় সেজন্য তার সরকার শিক্ষার গুণগত মানোন্নয়নে সর্বোচ্চ গুরুত্ব দিচ্ছে। প্রধানমন্ত্রী বলেন, এই বছর এইচএসসি'র ফলাফল একটু খারাপ হলেও আমরা শিক্ষা ব্যবস্থাকে আধুনিক করে গড়ে তুলে এর গুণগত মানের দিকে সর্বোচ্চ অগ্রাধিকার প্রয়োগ করেছি। সকল বিষয়ের প্রতি বিশেষ করে উত্তরপত্র মূল্যায়ণে বিশেষ নজর দেওয়া হয়েছে যাতে ভবিষ্যৎ প্রজন্ম বর্তমান বিশ্বের সঙ্গে তাল মিলিয়ে বেড়ে উঠতে পারে। তিনি গতকাল ২৩ জুলাই রোববার তাঁর সরকারি বাসভবন গণভবনে এইচএসসি এবং সমমানের পরীক্ষার ফলাফল গ্রহণকালে একথা বলেন। সূত্র-সংবাদ (শেষ পৃ.,ক.৩), সমকাল (পৃ.৩,ক.১), এশিয়ান এজ (পৃ.১,ক.৪), ডেইলি সান, (পৃ.১,ক.১)।

২। রুটিন ওয়ার্ক নয়, উদ্ভাবনী শক্তি কাজে লাগান : জনপ্রশাসন পদক প্রদান অনুষ্ঠানে প্রধানমন্ত্রী

সরকারি চাকরিজীবীদের শুধু রুটিন ওয়ার্ক হিসেবে দায়িত্ব পালন না করে উদ্ভাবনী শক্তি কাজে লাগিয়ে জনকল্যাণে নিবেদিত হওয়ার আহ্বান জানিয়েছেন প্রধানমন্ত্রী শেখ হাসিনা। তিনি বলেন, শুধু রুটিন দায়িত্ব পালনে সীমাবদ্ধ থাকলে চলবে না। উদ্ভাবনী শক্তি দিয়ে আরও কি কাজ করলে মানুষের কল্যাণ হয় সেটা চিন্তা করে সেভাবেই পদক্ষেপ নিতে হবে। তাহলেই দেশ এগিয়ে যাবে। প্রধানমন্ত্রী গতকাল ২৩ জুলাই রোববার রাজধানীর ওসমানী স্মৃতি মিলনায়তনে জাতীয় পাবলিক সার্ভিস দিবস উদ্‌যাপন ও জনপ্রশাসন পদক ২০১৭ অনুষ্ঠানে প্রধান অতিথির ভাষণে একথা বলেন। সূত্র-জনকণ্ঠ (পৃ.১,ক.৫), সমকাল (শেষ পৃ.,ক.১), এশিয়ান এজ (শেষ পৃ.,ক.১), ইন্ডিপেনডেন্ট (শেষ পৃ.,ক.২)।

৩। মুক্তিযুদ্ধের সঠিক ইতিহাস শিক্ষার্থীদের জানাতে হবে : রাষ্ট্রপতি

শিক্ষার্থীদের মুক্তিযুদ্ধের সঠিক ইতিহাস জানানোর ব্যবস্থা নিতে সংশ্লিষ্টদের প্রতি আহ্বান জানিয়েছেন রাষ্ট্রপতি মো. আবদুল হামিদ। গতকাল ২৩ জুলাই রোববার ডাক ও টেলিযোগাযোগ প্রতিমন্ত্রী তারানা হালিম মুক্তিযুদ্ধের গণহত্যার ছবিসংবলিত স্মারক ডাকটিকিটের অ্যালবাম বঙ্গভবনে নিয়ে গেলে রাষ্ট্রপতি এ আহ্বান জানান। রাষ্ট্রপতি বলেন, এর মাধ্যমে নতুন ও আগামী প্রজন্ম বাংলাদেশের মুক্তিযুদ্ধের ইতিহাস সম্পর্কে জানতে পারবে। স্মারক অ্যালবামটি দেশের সব শিক্ষা প্রতিষ্ঠান যাতে সংগ্রহ করতে পারে এবং শিক্ষার্থীরা মুক্তিযুদ্ধের প্রকৃত ইতিহাস জানতে পারে সে উদ্যোগ নেওয়ার আহ্বান জানান রাষ্ট্রপতি। সূত্র-সমকাল (পৃ.১৯,ক.১), জনকণ্ঠ (শেষ পৃ.,ক.১) নিউজ টুডে (পৃ.৩,ক.৬), নিউ নেশন (পৃ.৩,ক.৬)।

৪। ভিয়েতনামের বিনিয়োগকারীদের বাংলাদেশে বিনিয়োগের আহ্বান স্পিকারের

জাতীয় সংসদের স্পিকার ড. শিরীন শারমিন চৌধুরী বাংলাদেশে বিনিয়োগ করতে ভিয়েতনামের বিনিয়োগকারীদের প্রতি আহ্বান জানিয়েছেন। গতকাল ২৩ জুলাই রোববার ভিয়েতনামের হ্যানয়ে কমিউনিস্ট পার্টির কেন্দ্রীয় কমিটির অফিসে দেশটির কমিউনিস্ট পার্টির জেনারেল সেক্রেটারি গুয়েন ফু ট্রিং-এর সঙ্গে সৌজন্য সাক্ষাৎকালে স্পিকার এ আহ্বান জানান। সূত্র-সংবাদ (পৃ.৪,ক.১)।

৫। স্বাস্থ্যখাতে দুর্নীতি করলে ছাড় নয় : স্বাস্থ্যমন্ত্রী

বরিশালসহ দক্ষিণাঞ্চলে স্বাস্থ্যসেবা খাতের উন্নয়নে সরকার ১ হাজার কোটি টাকার প্রকল্প গ্রহণ করেছে বলে জানিয়েছেন স্বাস্থ্যমন্ত্রী মোহাম্মদ নাসিম। তিনি বলেন, হাজারো সমস্যার মধ্যেও প্রধানমন্ত্রী শেখ হাসিনার নেতৃত্বে বর্তমান সরকার স্বাস্থ্যসেবা খাতকে এগিয়ে নিয়ে যাচ্ছে। এ খাতে সরকারের সব উন্নয়ন প্রচেষ্টা ও অগ্রগতি ম্লান হয়ে যাবে যদি সাধারণ মানুষ কাজক্ষিত সেবা না পান। এ কাজে কেউ অন্যায়-দুর্নীতি করলে তাকে ছাড় দেওয়া হবে না। গতকাল ২৩ জুলাই রোববার বরিশাল শেরেবাংলা চিকিৎসা মহাবিদ্যালয় (শেবাচিম) হাসপাতালে নিবিড় পরিচর্যা কেন্দ্র (আইসিইউ) উদ্বোধন শেষে চিকিৎসক সমাবেশে প্রধান অতিথির বক্তৃতায় মন্ত্রী এসব কথা বলেন। সূত্র-সমকাল (পৃ.২,ক.৫), ইন্ডেক্স (শেষ পৃ.,ক.৫)।

৬। চামড়াজাত পণ্য রপ্তানিতে বাংলাদেশ শীর্ষস্থানে যাবে : শিল্পমন্ত্রী

সাভারের চামড়া শিল্পনগরী পুরোদমে চালু হলে দেশের চামড়া শিল্প খাতে বৈপ্লবিক পরিবর্তন আসবে বলে মন্তব্য করেছেন শিল্পমন্ত্রী আমির হোসেন আমু। তিনি বলেন, এর ফলে চামড়াজাত পণ্য রপ্তানির ক্ষেত্রে বাংলাদেশ ক্রমান্বয়ে বিশ্বের শীর্ষস্থানে যাবে। শিল্পমন্ত্রী গতকাল ২৩ জুলাই রোববার জাতীয় পাবলিক সার্ভিস দিবস উদ্বোধন উপলক্ষে আয়োজিত আলোচনা সভায় এ আহ্বান জানান। সূত্র-ইত্তেফাক (পৃ.১৮,ক.৫), যুগান্তর (পৃ.১৭,ক.৬), নিউ নেশন (পৃ.১৩,ক.২), বাংলাদেশ টুডে (পৃ.৩,ক.৫)।

৭। নতুন পদ্ধতিতে খাতা মূল্যায়নে পাসের হার কমেছে : শিক্ষামন্ত্রী

পরীক্ষার খাতা মূল্যায়নে নতুন পদ্ধতি প্রয়োগ করায় সার্বিকভাবে পাসের হার কমেছে বলে মন্তব্য করেছেন শিক্ষামন্ত্রী নুরুল ইসলাম নাহিদ। তিনি বলেন, পাসের হার কম হলেও এতে বিস্মিত হওয়ার কিছু নেই। কারণ উত্তরপত্র মূল্যায়নে অবমূল্যায়ন বা অতিমূল্যায়ন রোধে বোর্ডসমূহ বেশ কিছু পদক্ষেপ গ্রহণ করেছে। এটা শিক্ষাকে আরও উন্নত করার পথ। গতকাল ২৩ জুলাই রোববার এইচএসসি, আলিম ও সমমানের পরীক্ষার ফল প্রকাশ উপলক্ষে সচিবালয়ে আয়োজিত এক সংবাদ সম্মেলনে তিনি এসব কথা বলেন। সূত্র-ইনকিলাব (পৃ.১,ক.৮)।

৮। প্রবাসী কর্মীরা যেন সেবাবঞ্চিত না হন : প্রবাসীকল্যাণমন্ত্রী

প্রবাসী কর্মীরা যেন সেবাবঞ্চিত না হন সে লক্ষ্যে কাজ করার জন্য কর্মকর্তা-কর্মচারীদের প্রতি আহ্বান জানিয়েছেন প্রবাসীকল্যাণ ও বৈদেশিক কর্মসংস্থানমন্ত্রী নুরুল ইসলাম বিএসসি। তিনি বলেন, সরকারি কর্মচারীরা জনগণের অর্থে পরিচালিত হয়। যার যার অবস্থান থেকে মানুষের কল্যাণে এগিয়ে আসতে হবে। কোনো প্রবাসী কর্মী ও তার পরিবারের সদস্যরা যেন প্রাপ্ত সেবা থেকে বঞ্চিত না হন, সে বিষয়ে সংশ্লিষ্ট সবাইকে এক হয়ে কাজ করতে হবে। মন্ত্রী গতকাল ২৩ জুলাই রোববার ঢাকার ইন্সটানে প্রবাসীকল্যাণ ভবনের ব্রিফিং সেন্টারে 'জাতীয় পাবলিক সার্ভিস দিবস' উপলক্ষে আলোচনা সভায় প্রধান অতিথির বক্তব্যে এসব কথা বলেন। সূত্র-যুগান্তর (পৃ.৩,ক.৮)।

৯। বিমানের হজ ফ্লাইট শুরু আজ

আজ ২৪ জুলাই সোমবার শুরু হচ্ছে বিমান বাংলাদেশ এয়ারলাইনসের হজ ফ্লাইট। ৪১৯ জন হজযাত্রী নিয়ে সৌদি আরবের জেদ্দার উদ্দেশ্যে প্রথম হজ ফ্লাইট ঢাকা ছেড়ে যাবে। বেসামরিক বিমান পরিবহণ ও পর্যটনমন্ত্রী রাশেদ খান মেনন বিমানবন্দরে উপস্থিত থেকে উদ্বোধন ফ্লাইটের হজযাত্রীদের বিদায় জানাবেন। সূত্র-প্রথম আলো (পৃ.৫,ক.৪) ইনকিলাব (শেষ পৃ.,ক.১) এশিয়ান এজ (শেষ পৃ.,ক.৮), নিউজ টুডে (পৃ.১,ক.৮)।

১০। বাড়ি করতে খরচের ৭৫% ঋণ পাবেন প্রবাসীরা : বাংলাদেশ ব্যাংকের প্রজ্ঞাপন

প্রবাসী বাংলাদেশীদের জন্য দেশে বাড়ি নির্মাণের ক্ষেত্রে ঋণ সুবিধা বাড়িয়েছে বাংলাদেশ ব্যাংক। এখন থেকে প্রবাসী বাংলাদেশিরা দেশে বাড়ি বানাতে মোট খরচের ৭৫ শতাংশ পর্যন্ত ব্যাংক ঋণ নিতে পারবেন। আগে মোট খরচের ৫০ শতাংশ পর্যন্ত ঋণ নেওয়ার সুযোগ ছিল। গতকাল ২৩ জুলাই রোববার এ সংক্রান্ত একটি প্রজ্ঞাপন জারি করেছে কেন্দ্রীয় ব্যাংকের বৈদেশিক মুদ্রানীতি বিভাগ। সূত্র-ইত্তেফাক (পৃ.১৭,ক.১), জনকণ্ঠ (পৃ.১৮,ক.১), ফিন্যানশিয়াল এক্সপ্রেস (শেষ পৃ.,ক.১)।

সম্পাদকীয়

ক. সংবাদ : যুক্তরাষ্ট্রভিত্তিক ইউনাইটেড স্টেটস ফ্যাশন ইন্ডাস্ট্রি অ্যাসোসিয়েশনের করা এক জরিপে বাংলাদেশের পোশাক খাত কমপ্লায়েন্স ঝুঁকিতে রয়েছে এ তথ্য জানার কথা উল্লেখ করে যেসব পোশাক কারখানা পুরোপুরি কমপ্লায়েন্স মেনে চলে না সেসব কারখানাকে তা মেনে চলতে উদ্বুদ্ধ করার আহ্বান।

খ. ইত্তেফাক : দেশে বর্তমানে সাড়ে সাত হাজারের বেশি নন-এমপিও শিক্ষাপ্রতিষ্ঠানের প্রায় সোয়া লাখ শিক্ষক এমপিও থেকে বঞ্চিত এ খবরে উদ্বেগ প্রকাশ করে এমপিভুক্তি নিয়ে অনিয়ম বন্ধ করে এর আওতা বাড়ানোর সুপারিশ।

- গ. জনকণ্ঠ, নিউ নেশন : চট্টগ্রামের সীতাকুণ্ডের দুর্গম অঞ্চলে পাহাড় ধসে মাটি চাপা পড়ে নারী ও শিশুসহ পাঁচজন নিহত হওয়ার ঘটনায় উদ্বেগ প্রকাশ করে এভাবে বার বার পাহাড় ধসের ঘটনা রোধে সুষ্ঠু ও সমন্বিত মহাপরিকল্পনা নেওয়ার ওপর গুরুত্বারোপ।
- ঘ. যায়যায়দিন : অনেক বেসরকারি বিশ্ববিদ্যালয়ের শিক্ষার মান প্রশ্নবিদ্ধ হওয়ায় এ ব্যাপারে বিশ্ববিদ্যালয় মঞ্জুরি কমিশনকে নজর দেওয়ার সুপারিশ।
- ঙ. ইন্ডিপেনডেন্ট : ভ্রমণের সব বৈধ ও প্রয়োজনীয় কাগজপত্র থাকা সত্ত্বেও প্রায় প্রতি সপ্তাহে মালয়েশিয়ার কুয়ালালামপুর বিমানবন্দর থেকে শত শত বাংলাদেশি বিখ্যাত ও গণমান্য ব্যক্তিদের ফেরত পাঠানোর ঘটনা তুলে ধরে মালয়েশিয়ান ইমিগ্রেশন অথরিটি ও সেখানকার বাংলাদেশ হাইকমিশনকে দ্রুত এ ব্যাপারে প্রয়োজনীয় পদক্ষেপ নেওয়ার আহ্বান।
- চ. ডেইলি সান : দেশের দুর্গম এলাকার স্বাস্থ্যকেন্দ্রগুলোতে প্রয়োজনীয় সংখ্যক ডাক্তার, নার্স, প্রশিক্ষণপ্রাপ্ত মেডিক্যাল স্টাফ ও ওষুধের অভাবে গ্রামাঞ্চলে স্বাস্থ্যসেবা বিঘ্নিত হওয়ায় দ্রুত এ অবস্থার উন্নয়নের সুপারিশ।
- ছ. ডেইলি স্টার : আন্তর্জাতিক গণিত অলিম্পিয়াডে অংশগ্রহণকারী বাংলাদেশি টিমের অসামান্য সাফল্যে অভিনন্দন জানিয়ে সরকারকে এসব বিষয়ে আরও পদক্ষেপ নেওয়ার আহ্বান।
- জ. নিউ এজ : আইন ও সালিশ কেন্দ্রের রিপোর্টে প্রকাশিত গণপিটুনিতে ২০১৬ সালে ৫১ জন নিহত হওয়ার ঘটনা তুলে ধরে গণপিটুনি নিরুৎসাহিত করতে সরকারকে এ ব্যাপারে দৃষ্টান্তমূলক শাস্তির ব্যবস্থা করার সুপারিশ করে সম্পাদকীয় প্রকাশ।

উপ-সম্পাদকীয়

ইত্তেফাক পত্রিকায় প্রকাশিত কলামে উল্লেখ করা হয়েছে, টেকসই উন্নয়নের লক্ষ্য পূরণে সমাজ, সংস্কৃতি, রাজনীতি ও অর্থনীতিকে প্রয়োজনীয় সংস্কার ও সমন্বয় করতে হবে।

নিবন্ধ ও ফিচার

সংবাদ পত্রিকায় প্রকাশিত ‘শিশুর মানসিক সুস্থতার জন্য অভিভাবকের সচেতনতা জরুরি’ শিরোনামের নিবন্ধে অভিমত প্রকাশ করা হয়েছে, শিশু-কিশোররা মানসিক সমস্যায় বেশি ভুগতে পারে, তাই সন্তানদের কথা বিবেচনা করে অভিভাবকদের কর্তব্য সন্তানদের জন্য অনুকূল পরিবেশ বজায় রাখা।

#

ডালিয়া/শুকলা/মরজিনা/সাইদা/তানিয়া/২০১৭/৯.০০ঘন্টা

